

U PUORCHE 'E PISCIARIELLE

Francische Pisciariele è nu cumpagnone. Chiù cumpagnone 'é isse pènze ca 'n ce ne štanne pe' tutta Campuasce. Ce štà da dice pure, ca Francische nn'è sule cumpagnone, ma è pure sciampagnone; nne bara a spése!

Éva na séra 'é jennare e 'nte diche quanda néva éva carute da la séra prima 'ffine a tutte la jurnata. Campuasce parèa nu pressèpie. L'arbure 'nnant'a u Munecipie évene tutte ġhianchiate e sotte a le canare štèane affelate tanta pisciuotte.

Francische a na cèrt'óra ze ne va a la casina a farze na partetèlla, cumme facèa spisse, che le cumpagne suo'.

U letruozze a la fina de la partita z'u teravene a passatèlla.

Mò a na cèrta óra Cécchine, che all'època éva u canteniére de la casina, fa vicine all'aštante: 'Uagliu' i' mò haja chiurre ch'è tarde e fóre sciocca a pile 'é 'atte. Responne Giuanne u Presentuse pe fa na battuta: e te ne fa na cataratte!

Cécchine sènza rà rètta rice: Mè, iamme bèlle ce ne avéma j'.

La cumpagnija che allóra ze sentiva de šta a u mèglie, cerca de rà spaghe a Cécchine pe guaragnà tiémpe, ca làrrénte ze štèa calle e la cumpagnija éva allègra. Sa' cumm'è, c'u fridde u gnoštre cala mèglie!

Ma Cécchine nne vulèa sapè scuse. Quinde, a na cèrta ora, sbatte a tutte fóre e ze ne va.

La bóna cumpagnija ncumènza a fa: addò éma j'; ch'éma fa a la casa, 'ncoppe e sotte, tiritire e tiritéra, a nu cèrte punte va Francische Pisciariele e dice a le cumpagne: 'Uagliu' jammecénne tutte a la massaria mè', ca là oggi ém'accise ddù puorce! Appicciamme u fuoche, u vine ce šta, e se vo' sciucca u tiempe, óh che sciocca!, ca nu štème buone.

Allóra tutte l'amice facénne: sine jammecénne, uagliu' tutte au casine 'é Francische... viva Francische, evviva! E ncumènzene a cantà pe la via: "Turname a véve ca ru vine è buone... turnamela a cantà chésta canzóna...ecc."

La cumitiva piglia 'é z'avvia au casine au Colle Lione.

Arrivene là, chi ze rà da fa a 'ppiccià u fuoche, chi va piglià u perétte 'é vine rusce, chi piglia la fressora pe fa u cicule, chi la peparulèssa rént'a la runcèlla, insomma ognune ze rèa da fa.

Attacchene pure a jucà a carte e 'ccusì passene tutta la nuttata a jucà, a cantà, a magnà e véve rénte au casine 'é Francische.

A la matina priéste Francische ze retira a la casa sènza farze accorge da la mugliéra e fa finte ca z'è addurmite rént'a la cucina, cundecénne ca làrrénte ce facèa chiù calle.

A na cèrta óra, fa la mugliéra: mèh, Franci', 'gliutta ca jama au casine a spetaccià u porche ca ncumenzame a fa le sauciccia.

Francische bèlle allègre allègre fa: Sì, jame jame ca me voglie fa bèlle tunne tunne oggi.

Z'avviene allegre allegre pe la via e arrivene au casine.

La mugliéra va pe arrapì la porta e tróva appise sule le cape de le purcièlle. 'Mména n'allucche, la puurèlla: Z'hanne frecate le

puorce... Maronna mè'... chi è štate, ze le pozzena carufà le vurèlle, p'u sanghe d'u nemmiche de Crište! Puzzata èsse accise a la currèa. Figlie de puttane! Francische vére le peruttièlle vuote tutte sparze pe la massaria e fa: Figlie de zocchele, nn'abbaštavene le puorce v'éte frecate pure u vine!

U fetènte sciaurate, facèa finte ca štèa 'ncazzate, ma sotto sotto ze la rerèa cuntiènte e dicèa a la mogliéra: chisse cèrtamènte saranne štate le zinghere ca so' passate l'àutamatina. Ma mò che vuléme fa, mò ce n'accattame n'aute e ddù, c'éma tené paciénza, che te vuo' fa menì nu panteche?. Che ce vuléme mètte che 'sse brijante assassine!...

Inzomma pe ve la terà brève, Francische e le quatte cumpagne suo' furene capace rént'a na nuttata de frecarze ddù puorce e nu quintale 'é vine!

Tante éva u sfunne 'e Francische, che ija 'nnummenate pe la pisciata longa e da allora reventatte famose pure pe la cajónza .